

Pendekatan holistik jadikan media Malaysia lebih wibawa



Pensyarah Kanan, Jabatan Komunikasi, Fakulti Bahasa Moden dan Komunikasi, Universiti Putra Malaysia

Oleh Dr Mastura Mahamed
bhrencana@bh.com.my

Dalam reaksi terhadap laporan *Reporters Without Borders* (RSF) mengenai kemerosotan prestasi Malaysia dalam Indeks Kebebasan Media Dunia 2024, Pusat Kewartawanan Bebas (CIJ) menyifatkan ia didorong akibat tindakan kerajaan menapis dan menyekat hantaran atau perkongsian menyentuh sentimen 3R (agama, Raja dan kaum).

Amnesty International pula mendakwa kebebasan bersuara di Malaysia merosot selepas lebih setahun Kerajaan Perpaduan berkuasa disebabkan campur tangan pemerintah dalam bidang media.

Meskipun pada mulanya terdapat langkah positif menggalakkan kebebasan media, seperti penghapusan akta dikatakan me-

ngongkong media, namun perkembangan ini belum mencapai taraf memuaskan. Contohnya, Akta Komunikasi dan Multimedia 1998 masih memberi kuasa kepada pihak berkuasa memantau dan mengawal kandungan media.

Melihat laporan ini, industri media perlu memikirkan kaedah holistik dalam meningkatkan kebebasan dan fungsi mereka sebagai *The Fourth Estate*, berperanan sebagai pengimbang antara kuasa Legislatif, Eksekutif dan Kehakiman.

Kerajaan pula perlu meningkatkan kerjasama dengan pengamal media dan ahli akademik untuk

memastikan garis panduan pelaporan berita dipatuhi tanpa menyentuh sensitiviti 3R.

Selain itu, untuk mempromosi kebebasan media mengikut konteks tempatan, penting bagi Malaysia meningkatkan kesedaran rakyat dan pengamal media memastikan kebebasan didambakan tidak disalah guna termasuk melakukan reformasi menyeluruh dalam bidang media.

Langkah perlu diambil termasuk memperkuat undang-undang bagi melindungi kebebasan media, menghapuskan undang-undang boleh disalahgunakan atau menindas media, serta memastikan wartawan dan pengamal media dilindungi daripada tekanan politik atau ancaman.

Selain itu, pendekatan kolaboratif antara kerajaan, industri media dan masyarakat juga penting untuk memastikan kebebasan media seimbang serta berkualiti. Ini termasuk menggalakkan dialog terbuka antara semua pihak berkepentingan dan membangunkan kod etika mengiktiraf kepentingan kebebasan media sambil memastikan integriti melaporkan berita.

Dalam konteks global semakin kompleks ini, penting bagi Malaysia terus berusaha meningkatkan kebebasan media sebagai satu asas kepada amalan demokrasi kukuh.

Dengan memastikan akses bebas kepada maklumat dan memelihara ruang perbincangan serta perbezaan pendapat dengan hormat dan hemat, Malaysia dapat memastikan pembangunan mampan dan inklusif bagi setiap lapisan masyarakat.

Bagi meningkatkan ranking dan memperbaiki

mekanisme kebebasan media tanpa menyentuh sensitiviti 3R, pelbagai cadangan boleh diambil kira termasuk memperkuat perlindungan undang-undang terhadap kebebasan media.

Ia termasuk memastikan pemilikan syer media lebih seimbang dan berpecah kepada pelbagai pemilik berbeza, memperkenalkan dasar menggalakkan ketelusan dan akauntabiliti dalam industri media.

Selain itu, pembinaan kesedaran awam mengenai pentingnya kebebasan media dalam masyarakat demokratik juga penting. Ini boleh dilakukan melalui pendidikan dan kempen kesedaran awam memberi tumpuan kepada nilai seperti pluralisme, kebebasan berkarya dan akses kepada maklumat berkualiti.

Perbincangan dengan pemegang taruh bersama media, kerajaan, masyarakat dan badan antarabangsa untuk mencari penyelesaian bersepadu juga boleh memberikan impak positif meningkatkan kebebasan media di Malaysia.

Keterbukaan kerajaan mengadakan rundingan serta perbincangan bagi menangani berita palsu atau penyebaran maklumat tidak benar di negara ini bersama badan bertauliah RSF amat dialu-alukan bagi meningkatkan kefahaman perbezaan dan persamaan landskap media di Malaysia berbanding negara lain.

Hadirnya cabaran mutakhir melanda landskap media kini memerlukan satu pendekatan holistik membabitkan penyertaan pelbagai pihak bagi menjadikan landskap media Malaysia lebih progresif dan berwibawa.